

ORGOGLIO

3ª CLASSIFICATA - PRIMO PREMIO PLACIDO FARDELLA

Iò scola nun ni potti friquintari
nun vitti iocu, un vitti divirtuti
mi misi picciriddu a travagghiari
chi tanta genti ristarù alluccati,
cumpivi cinquant'anni di zappari
dunni strurivi la bedda saluti;
ma sta spinciazza la vogghiu ittari
mi fannu onuri sti manu ncadduti.

Mi fici vecchju e sugnu cuntintuni
nun penzu suffirenze stenti e peni,
e ogni gnornu cu lu mè zappuni
va scippu macchi, va zappu tirreni;
e cu lu scruscìu sò fazzu canzuni
e li presentu dunni veni, veni.

L'UNISTA'

Fu di lu Patr'eternu siminata
emblema di dicoru e dignità
poi di Gesù Cristu prdicata
pi nzignamentu a la cristianità,
fu di li nostri antichi prufissata
cu tantu zelu e scrupulosità;
vinni a li nostri iorna abbannunata
sustituuta fu di la viltà.

Difatti nun'è chiù cosa mpurtanti
anzi s'abbannunò cumpletamenti
pirchè li scurcaturi e li birbanti
attraversu di tanti spirimenti;
la difineru cosa disprizzanti
dicennu chi produci picca e nenti.

LU NIRU

*P'un vagabbunnu jari na risata
un nuzzinteddu ci appizza la vita*

Un gnornu sennu stancu di zappari
pi cogghiri na l'arma di suspiru,
na lu mè locu mi misi a firriari
ma arrivatu nto n'arvulu di piru
senza aspittallu sentu svulazzari
mi fermu sull'istanti e fazzu un giru;
m'aisu l'occhi cumenciu a taliari
nta na ramuzza ci vitti n'aniru.

Iò lu taliava cu tantu stupuri
era n'aniru di na zuvinedda
tuttu adurnatu di tanti culuri
fattu di ciuri sicchi e fratticedda
chi ddà zuvina cu tantu d'amuri
s'avia criatu la sò casinedda;
e supra dd'arvuliddu tuttu nciuri
vi ricu ch'era na cusuzza bedda.

L'istintu stessu mi fici curiusu
difatti appiccicavi nta rù botti,
cu lu cori trimanti e piatusu
lu vitti chinu, chinu d'aciddotti;
chi ddà zuvina cù cori amurusu
ci riparava lu friddu la notti;
quannu turnai ristai dilusu,
l'avianu sfasciatu li picciotti.

Mi 'ntisi fussi un focu chi svampava
tuttu lu corpu nta na caluria
e pi la strata mentri caminava
vitti un picciriddu chi curria;
d'acidduzzu ann'aria ittava
comu na petra poi nterra sbattia;
lu picciriddu letu, scarcaniava
ma l'acidduzzu, n'amentri muria.

ME' MATRI

Targa di riconoscenza del Comune di Misterbianco, 13 Luglio 1986

Fimmina saggia, fimmina assinnata
paria santa, quannu chi parlava,
di tuttu lu paisi rispittata;
pirchè puru a li petri rispittava;
iò la ricordu sempri acchiffarata
o cu la scupa nmanu o chi lavava;
li sò manuzzi eranu di fata
quantu rranni sirvizza spirugghiava.

A ottant'anni iunta tutta bianca
ogni matina e quattru si susia
mischina caminava supra un'anca
chi la carina chiù nun ci riggia;
ma nun lu dissi mai; mi sentu stanca,
morsi scupannu la carrittaria.
Sunnu vinticincannj chi mi manca
ma iò la chiamu sempri: MATRI MIA.

ALLA CASSA RURALE

Speru signuri mè chi mi scusati
siddu mi vinni ntesta st'opunioni
vistu chi semu tutti radunati
afferru a volu sta bedda occasione,
di ringraziari tutti l'impiegati,
tuttu u cunsigghiu d'amministrazioni
vistu chi sunnu cca, puru presenti
GRAZI a lu DIRITTURI e o PRISIDENTI.

St'iornu na pocu appimu l'onuri
fomu insigniti di gran fidiltà
e oltri a la midaglia di valuri
comu rispettu d'anzianità;
anchi don PETRU lu sò fundaturi
è nsemi cu niatri puru ccà
vinni a purtari li soi AUGURI
di paci, beni e pruspirità.

ADURNAMENTU

Adornanu un paisi li funtani
adornanu na terra li villini
adornanu na chiesa li campani
adornanu l'altari li parrini
adorna un cacciaturi lu sò cani
adornanu na donna l'oricchini;
adornanu lu stipu pasta e pani
e na dispenza carratuna chini.

Dù nuvuliddi adornanu la luna
un bon cancellu adorna na casina
un tronu e na billissima curuna
adornanu la corti e la rigina
un bengiu, na chitarra e na canzuna
adornanu na bedda siritina
un sguardu, na carizza e dù vasuna
ci adornanu li labbra a Giuvannina.

Adorna un'asta na bedda banneru,
no Ministeru na gran mangiatura,
adorna un sceccu na bedda tistera,
a lu cavaddu la sò bordatura,
a na imenta na bedda criniera
adorna un pau na pumpusa cura;
o sgangulatu na bedda dintera
adorna un lettu na fimmina nura.

ALLA RIVISTA DAVIDE

La quale mi ha chiesto dieci poesie inedite e siccome in quella richiesta vi erano inclusi 54 illustri personalità della cultura iò nun rispunnivi. Al secondo invito ho mandato le poesie, scusandomi del mio silenzio.

Lu vint'ottu Giugnu fu di vènnari
na littra ricivì, iò eru a tunniri
la gioia chi pruvai pò cumprenniri
quannu chi la liggivi l'atru lunniri;
m'invita a virsiggiari e nta lu spenniri
sempri mi trova, nun mi fa cunfunniri;
ma p'un vuliri lu mè nomu offenniri
nemmenu mî dignavi di rispunniri.

Pi chissu un rispunnì, pi suggizioni
timennu li risati chi farà
pirchè sugnu spruvvistu di struzioni
e la sfortuna nichei mi fà,
mi fa campari sempri ncunfusioni
sù ottu chi mi ricinu papà;
però mî goru la sudisfazioni
sugnu campiuni di la puvirtà.

Ma speru chi m'havissi a pirdunari
s'un ci mannavi nudda puisia,
mi piaci giustamenti virsiggiari
cu chiddi di la mè caticuria
di ddi cosi chi pozzu ragiunari
a la purtata di la forza mia;
chi voli ? cu la quarta elementari
parlari pozzu di filosofia ?

Lei scrivennu cu tanta primura
mi dumannava versì mpuisia
facennu lodi di la mè bravura
di tanta produzioni e valintia;

cun tuttu chi nun'haiu nudda cultura
la testa mi la misi nfantasia;
fu pi dda lista di ddi prufissura
chi dissi: c'hannu a farini cu mia ?

Sugnu comu un fascellu fracassatu
un fascellu ch'un pò ghiungiri la meta
e passu la mè vita ngustiatu
sempri cunfusu la testa scueta
disprezzu lu distinu scilliratu
chi crisciri mi fici analfabeta;
e tanti chi nun sannu lu mè statu
mi dunanu lu peccu di PUETA.

E mi l'agghiuttu mischinu di mia
ma mi l'agghiuttu contru vuluntà
pirchè vulennu fari Puisia
nun basta sulu la capacità,
mi servi cu la pinna mi mania
puru m'occurri la tranquillità;
scrivu pi forza qualchi fissaria
e tanti voti la lassu a mità.

Ora chi cunfissai lu mè difettu
spirassi di lassallu suddisfattu
di virsiggiari veru mi diletto
però p'un versu iurnati cummattu
e quannu mi rinesci qualchi sunettu
è strammu, squilibratu e malu fattu;
dintra sta busta la mmustra ci mettu
unitamenti cu lu mè ritrattu.

Dopo una ventina di giorni mi riscrive, dicendo che le mie poesie sono state accolte dalla commissione e pronte per la stampa (Voce della Conca d'oro) chiedendo che prenotassi per me n. 20 copie facendomi il 20 x 100 di sconto.

'A LU DIRITTURI

Mi voli diri quali guapparia
usannu ssù sistema voli fari ?
iò certi voti penzu ntesta mia
e dicu: comu mai si pirsuari ?
anchi lu chiù minchiuni chi ci sia
sicuru chi s'havissi a ribillari;
iò scrivu versi, li mannu a vossia
vossia li stampa e ghiò mi l'accattari ?

Nautru fattu a pinzari mi runa
e nun lu dicu pi faricci un smaccu,
pò dumannari a qualunqui pirsuna
ci dicinu: sbagliau di taccu e taccu,
ognunu comu senti la canzuna
rispunni comu fici mè zzù Marcu;
pirchè na stu paisi si raggiuna
gatti, nun si n'accattanu no saccu.

Perciò capisci Diritturi amatu
un volumi nun lu pozzu prinutari
pirchè na stu paisi scilliratu
la genti sunnu boni pi smangiari
di nna frivaru sù disuccupatu
cu ottu figghi e mogghi sustintari;
siddu mi criri mi trovu a lu statu
d'un soldu nun mi pozzu dispisari.

Quinti a li sò peri mi rimettu
spirannu chi vinissi pirdunatu
mi lu disidirassi un volumettu
ma comu fazzu ? Signuruzzu amatu ?

si m'ù rigala; l'aggradu, l'accettu
e mentri campu ni restu ubbligatu;
chiuru la littra cu tantu rispettu
l'abbrazzu e vasu cu tuttu lu ciatu.

*Siddu lu libru lu ficiru o nò un ni sacciu nenti, però nun ci bastau la
facci magari a rispunniri.*

LU FRIDDULUSU A NA SIGNURINA

Na la mè casa, un c'è nuddu ristoru
nun c'è nè stufa e mancu cufularu,
e cu stu gran timpazzu misu nmruru
ni misi a moddu comu baccalaru;
cu st'autru vintazzu puntaloru
senza cappottu, quantu mi riparu,
sicuramenti sta mirnata moru
p'ù friddu di ricemmaru e ghinnaru.

Tù chi pusseri tutti ssì ricchizzi
ssù pettu nfora, ssù labbru nfucatu,
a farimi un favuri chi ci appizzi?
e mentri campu ti ni sugnu gratu;
fammi aggranfari na ssì biunni trizzi
nta lu tò pettu tenimi abbrazzatu;
nveci trimari cù sti carni rizzi
mi staiu sta mmirnata riddussatu.